

皇明經世文編

皇明經世文編卷之十二

陳子龍臥子 徐孚遠闇公

華亭

選輯

宋徵璧尚木 周立勳勒貞

夏允彝瑗公參閱

王翰林奏疏

疏

王叔英

資治策疏

富民之術

葉居升上疏似賈生此疏似仲舒皆盛世石畫之

臣聞天生斯民立之司牧而寄以三事曰庶富教是

文

也為人君者將欲遂民之庶必先有以富之既富之

然後可以教之。今天下之民未甚庶，未能從上之教者。以富之之道有未至焉耳。富之之道，臣嘗讀大學而知之矣。有曰：生財有大道，生之者衆，食之者寡，爲之者疾，用之者舒，則財恒足矣。是則平治天下之道，實本於此。臣竊觀之，天下凡有害于此者，亦頗知其畧矣。恒產未制而貧富不均，賦斂未平而田多荒蕪，此二者，生之乏本之害也。軍卒有多餘之丁，而惟務於工商，僧道有汚雜之衆，而失力于耕稼，民之務未者常勝，而務本者常負，此三者，生之未衆之害也。養

兵太多。而有徒食之軍。冗食未汰。而有素餐之員。此二者。食之未寡之害也。官司役民。或奪其時。或盡其力。此二者。爲之未疾之害也。土地有可養之物。而不養。民粟有可儲之時。而不儲。民用有可省之費。而不省。此三者。用之未舒之害也。臣請得而詳言之。古者井田之制。一夫授田百畝。故民生業均。一後世井田既廢。故民業不均。至于後魏有均田之法。北齊有永業之制。唐有口分世業之田。雖非先王之道。然亦庶幾使民有恒產者。自唐以後。恒產之制不行。富強兼

併至有田連阡陌者。貧民無田可耕。故往往租耕富
 民之田。亦輸其收之半。繇是富者愈富。貧者愈貧。此
 恒產未制之害。是以貧富不均也。古者田皆在官。故
 什一之稅。通乎天下。而賦斂以平。後世田有官民之
 分。稅有輕重之異。官既事繁。而需于民者多。故田之
 係于民者。其賦不得不重。惟係于官者。其賦輕而亦
 有過于重者。官民之田。肥瘠不等。則賦稅有差。然或
不敢。故故肥瘠輕重多有未均者。
 造籍徇私。以肥為瘠。賦當輕而反重者。往往有之。若
 夫官田之賦。雖比之民田為重。而未必重于富民之

高帝時法嚴田冊一定吏不敢請民

租。然輸之官倉，道路既遙，勞費不少。收納之際，其弊更多。故亦或有甚于輸富民之租者。絲是官民之田，其實有可輸富民之餘，而又有可酬其力者。民然後可得而耕，其不然者，則民不可得而耕矣。此賦斂未平之害，是以田多荒蕪也。斯二者，豈非有害于生之本乎？古者兵出於農，則兵固自耕而食者也。今爲兵者，既不耕而食於農者多，而又多餘丁，不爲商則爲工，是亦不耕而食於農者，人之務末者衆，而務本者寡。實繇乎此，此軍卒有多餘之丁，可以裁減歸農。

而未裁減之故也。古之爲民者四，曰士農工商而已。後世益之以僧道，而爲民者六。故務農者益寡，況二氏之教，本以清淨無爲爲宗，而後世爲其徒者，多繇避徭役而托于此。又倚其教，能使人尊奉，有不耕而食不蠶而衣之利，繇是爲之者衆，往往食肉飲酒，華衣美食，肆欲營利，無異于汙民。是則于其本教，旣忍違之，况可律之以聖人之教乎？其人可耕稼而不耕，稼乃托佛老以爲生，無補于世道，而有敗于風俗，愚民不知彼之身已獲罪難免，猶謂人之事彼者，足以

獲福。且輟已之衣食以奉之。其惑世誣民甚矣。昔唐高祖嘗議除之。正以人之坐食者衆。而資食者少。實繇於此。此僧道有汗雜之衆。可以省除助農。而未省除之故也。古者制民之法。以農爲本。故常厚之。以商賈爲末。故常抑之。後世抑末之法猶存。而厚本之法每病于費廣。食衆不能行之。故爲商賈者益多。然商賈獲利既厚。而財貨有餘。農民往往衣食不給。反稱貸于商賈。况又有工藝之家。男女或盡棄耕織不務。而施奇技淫巧爲服用之物。以漁厚利。徒多費工力。

而無益于實用，農人竭一家之力者，或不足以當其一夫之獲積一歲之收者，或不足以侷其一旦之售

絲是務末者，恒有餘。而務本者，恒不足。斯三者，豈非

有害于生之未衆者乎？古者天子六軍，諸侯用兵不

身若令天下皆自守之，如今制則列國之兵何啻

過三軍。近世宋太祖定天下，精兵不過二十萬，十萬

數萬哉

屯京師，十萬屯外郡。今京師之兵已十萬，而在外郡

者，不知其幾，以此推之，今之兵過多，而有徒食者可

知矣。天下賦斂之難平，儲蓄之未豐，實繇于此。昔唐

虞稽古，建官惟百。夏商官倍，亦克用乂。後世事漸繁

密。故官亦漸增。然唐太宗省內外之官。定制七百三十員。曰。吾以此待天下之賢足矣。今內外大小之官。數以萬計。以此推之。今之官有冗員而多素餐者。亦可知矣。天下賦斂之難平。儲蓄之難豐。亦繇于此。斯二者。豈非有害于食之未寡者乎。古者用民。歲不過三日。然役之必于農隙之時。後世事繁。故徭役寢多。唐太宗制租庸調之法。歲不過役民二十日。蓋繇其能省事故也。故其法至今稱之。今天下有司。役民無度。四時不息。繇其不能省事故也。至于民稀州縣。人

丁應役不給。丁丁當差。男丁有故。役及婦人。奈何而民不窮困乎。蓋緜州縣有應併省而不併省者。其民既稀。其役自繁。是以民稠州縣。雖不盡其力。亦奪其時。民稀州縣。既奪其力。又奪其時。斯二者豈非有害于爲之未疾者乎。古者山林川澤。與民共之。而有厲禁。是以斧斤以時入山林。而材木不可勝用。數罟不入洿池。而魚鱉不可勝食。後世之民。困于徭役者多。故其入山林不能限之以時。急于近利者衆。故其人洿池多以數罟。繇是材木不給。魚鱉不充。此所謂土

地有可養之物而不養者也。古者三年耕而有一年之儲，九年耕而有三年之積，故雖有水旱之災，而民無菜色。後世賦重役多，故民無餘蓄。然漢宣帝時以歲數豐穀賤，農人少利，因置常平倉，令穀賤則增價而糴以利農，穀貴則減價而糶以利民。至隋唐皆有義倉，于收穫之後，勸農出粟，以防饑饉，皆良法也。今皆未行，或有水旱之災，何以備之。此所謂民粟有可蓄之時而不蓄者也。古者制民之用，宮室飲食器用衣服之制，婚姻喪葬祭祀賓客之禮，貴賤各有等差。

不得過侈而又無有釋老齋醮之設。妖淫鬼神之祠。故民無妄費。而財用常足。後世雖或有制。而未必盡行。故以庶民之賤。苟富有財貨之家。其居處服用之物。與夫吉凶之禮。擬于公侯者有之。其貧無財貨者。雖居處服用之物。無以自給。至于婚姻之事。往往假借于人。務爲浮靡者有之。及有親戚之喪。亦窮竭家資。設作齋醮者有之。若疾病則訪之巫祝。禱之淫祠。苟乏祭物。或竭已貲。而致衣食窘乏者有之。必舉債于人。而致田廬典賣者有之。此所謂民用有可省之

費而不省者也。此三者豈非用之未舒之害耶。凡此數者特其大畧耳。若其他固非臣之所能盡知而徧舉也。陛下誠能因臣之所知而益求其所未知。明其爲害則除之。明其爲利則興之。將見富庶之效不數年而可致。而教化之行不難矣。

皇明經世文編卷之十三

陳子龍卧子 徐孚遠闇公

華亭

選輯

宋徵璧尚木 李待問存我

李 雯舒章參閱

榮國恭靖公集

頌

姚廣孝

神龜頌 并序 神龜頌

大明太祖聖神文武欽明啟運俊德成功統天大孝

高皇帝洪武三十一年陟遐以來至今永樂二年已

及七祀，今上皇帝陛下，爲繼體之君，受命膺

籙，思念太祖神功聖德，夙夜靡寧，欲立碑孝陵，

而未得其石，乃召石工四出尋採，而不有獲，一日工

至龍潭，俄遇一石，長濶數丈，鑿土深三丈，未見其根，

偶于石罅中，得一石龜，僅盈尺，隆脊而昂首，蟠尾而

藏足，其靈光燁燁射人，工獲之而進焉。上大悅，擇

日於奉天門，賜文武羣臣觀看，羣臣莫不忻忭稱

賀，實爲希世之大寶也。噫！此豈非聖君孝誠之至

感乎！上下神祇，而致斯祥哉！皇祖在天之靈，得不

慰悅而昭鑒也。太子少師臣姚廣孝，不揣短才，忝官
文職，睹茲嘉禎，豈容默默。於是稽首頓首，獻以頌曰：
於赫皇祖，道齊邃古。上帝錫祐，肇基洪武。爲天
下之父，爲天下之父。孰敢不來服。惟帝用賓，棄我
下民。我民其傷，如喪吾親。嗣皇爲君，桓撥孔厯。
舊邦維新，思我皇祖。夙夜靡有寧，烈烈神功，巍
巍聖德。後古是則，須以銘刻。用彼玄石，玄石潛密。
遐搜罔得，猗龍潭之陽。石乃發祥，嗣皇孝彰。神龜是
張，龜文其甲。惟天之假，非果非獮。非使非蔡，大寶

煥若著 君之明達維龜匪偶千歲奚久其神采守
 其神采守徵 君之壽 君壽無疆股肱惟良以綏
 遐荒子孫用光萬世其永昌

平安南頌 并序 平安南頌

是時輜臣俱有頌榮公其一也

臣廣孝頓首載拜上言臣伏見 皇帝陛下自洪武

三十二年已來奸臣惡黨亂我家邦 陛下惟 皇

祖社稷是慮不免興兵躬行征討歷風霜冒矢石雖

百戰百勝而未嘗有殺人之心內難既平登 大寶

位改元永樂不四三年乾坤清寧民用輯和天下太

康日月所照之處，罔不來庭，竒珍異獸，進無虛日。臣子觀之，無任忻忭。臣竊自念，陛下萬歲，與臣子同享太平之福於無窮也。比者安南孽臣叛逆無道，

陛下乃命將出師一舉而夷其城，戮其醜，四海萬邦聞之，莫不中心悅服。永樂五年丁亥三月初吉，捷奏宸廷，文武百官具服上表稱賀。臣忝居文職，不愧年耄才疎，謹撰鄙言以頌陛下神功聖德之萬一也。臣冒死百拜以進，其詞曰於赫皇帝，惟古聖智，不殺爲心，德同天地，內難旣平，四方惟寧，干戈用藏。

六合雷聲，君明臣良，天下太康，迺緝迺熙，迺播迺揚，普天率土，罔不歸附，競先効竒，獻琛輸賦，以慰元元，以卑安安，鳥章椎髻，皆識衣冠，雨暘靡厄，有秋可穫，萬邦同懽，率繇禮樂，蠢爾安南，姦驕貪婪，不保其國，弗畏于天，上待以義，每加柔惠，不思修省，猖獗愈肆，以侵我疆，以虐我民，天若不討，天失其仁，爰振師旅，拯民疾苦，乃命上將，如彼方虎，軍行南圖，一出，睿謨授以節鉞，無梗弗鋟，天兵烈烈，威震百粵，狐鼠跳梁，自取誅滅，厥城以夷，厥醜以鉅，海波。

不動春。日遲遲。神武無敵光昭。天德殺以不義以
生萬國。羽書南來。奏捷。彤墀羣臣稽首。載跪陳詞
炎荒旣靜。銅柱斯永。刻石天厓。終古不泯。

平胡頌 并序 平胡頌

臣昔聞 太祖聖神文武。欽明啓運。俊德成功。統天
大孝高皇帝。繼天立極。平定四海。成大一統。分封諸

子以蕃 王室緊我 太祖見 皇帝陛下蚤具

引先朝事得體

大智。雄武英斷。出於人上。遂封於燕。太祖嘗謂羣

臣曰。吾 王坐鎮朔漠。朕無北顧之憂矣。四十餘年。

天清地謐。胡塵不飛者。皆 皇帝之力也。洪武戊寅
太祖賓天 皇帝繼登 大寶。應天順人。四國仰化。
九夷來歸。梯山航海。貢犀象而獻寶玉者。庭無虛
日。三軍萬姓。雍和緝熙。若唐虞之世。天地神明。至於
昆蟲草木。罔不喜豫。 陛下端居 九重。退奸進賢。
崇德信道。以詩書爲宮室。禮樂爲園苑。文章爲冠裳。
仁義爲心腑。恭儉淵默。正己南面。古之賢王。遠不及
矣。惟此殘胡遺孽。梗化不庭。跳踉草野。肆虐讎殺。
皇帝曰。吁。此胡虜者。生於沙漠。昏懵無知。而未嘗聞

一善言見一善行，所以從逆滋惡。徒欲殞厥命耳。朕甚憐之，且遣使賚勅書以撫諭，欲其自省改惡而全生也。豈意胡賊反不順，命拘殺我信使，寇攘我邊陲。皇帝不得不怒，乃謂廷臣曰：胡賊禽獸人也，不知禮義，惟務橫逆，罪不可宥。朕當親率六軍以討之。羣臣載拜稽顙，言曰：蕞爾胡虜，狐豕之類，跳踉叫喚於無人之境，豈知天之大小也。若舉兵討之，烏足以當我熊虎之將。願陛下運籌於九重之上，決勝於萬里之外，可也。冰谷雪積，人所不堪，其可枉

聖駕而勞玉體歟。皇帝曰吁，卿等所言愛朕之過也。豈不聞軒轅氏之戰蚩尤於涿鹿乎，朕但知殺賊以安天下，何恤此行勞苦。爾卿等無載言，於是卽命將帥整師旅，齊隊伍，節鉦鼓，襍旗纛，鑿山開道，輓粟飛芻，百物畢備。差日啓行，爰于永樂庚寅二月春日，載陽東風扇和。陛下出九重之城，御六龍之車，百靈導於前，萬騎擁於後，金盾雕戈而耀日，羽旄彩幟以遮天。虎賁之士，何其勇也。魚麗之陣，何其大也。號令一出，遵行恐後，奉公惟厲，不速而疾，曾未及月，卽

是侍三大營卒訓練整肅故擇日行師神速如此

抵虜境，羣兇嗷嗷，無處逃命，搜其窟穴，盡其醜類，所獲馬駝牛羊不計其數，掃淨朔漠，洗清草野，士卒卷甲，兵不血刃，誠爲王者之師，自古所無有也。凱奏

駕還，山川清明，父老黔黎，爭拜於道，昔之呻吟者，皆化爲謳歌矣。皇帝乘鸞輅登天門，御宸極。

告社廟，天日順祥，神人胥慶。太祖昔封燕，坐鎮朔漠，孰知今日之明驗也如此。太祖在天

之靈寧不慰悅也哉。皇帝陛下，神功聖德，當載之史冊，被之絃歌，勒之金石，以垂萬祀。此臣子之所先

務也。臣廣孝忝在文職，雖短才淺學，不足以發揮盛烈，豈可默默而已乎？遂作頌，百拜以獻。頌曰：於赫

皇帝，蚤以雄武受封。燕兮坐鎮朔漠，胡塵不飛。四十年兮。太祖陟遐，繼登寶位。握乾符兮道齊三皇

子養萬姓，永蘿圖兮。聲色犬馬珠玉金貝，不爲寶兮。詩書禮樂，制度文章，是所好兮。退奸進賢，化育流行。天下平兮。胡虜無知，猖獗草野。侮邊城兮。皇帝赫怒，卽日舉兵。躬行討兮。狐豕之類，彼惡敢當。若摧稿兮。六師煌煌，萬騎香香。示天威兮。直抵虜境。羣

兜倉皇。無所依兮。殲厥大憝。宥其徒衆。何寬仁兮。七
卒卷甲。兵不血刃。盎如春兮。凱奏。駕還。歸馬放牛。
如雲集兮。父老羅拜。來迎。鸞輿。歌且懌兮。奠於山
川。告于社廟。鬼神會兮。北南一覽。盡歸。王化。大
無外兮。神功烈烈。聖德巍巍。與天齊兮。紀諸
史冊。刻之金石。昭萬世兮。

書

與夏尚書

太祖實錄

僕衰老。欽蒙

聖恩。優存在家。終日杜門。沉坐。惟觀

皇明經世編

姚張二公集 太祖實錄

七

平露堂

佛待盡餘無足言者區區所念 太祖實錄萬世法

則此是 國家至重之事廣孝年來奉 命監修忝

與閣下同事然僕老且病才短識暗罔知所以不過

書名而已爾蒙意實錄中高廟實錄叙事繁簡併且言有條理非以最難書者發迹定鼎征伐

等項且喜彙完後數朝之錄可此進了當其餘事類全賴閣下與

祭酒學士諭德諸總裁先生商議凡事訪問稽考從

實修纂補遺潤色次第成書以副 上意也如或延

緩歲月寢久亦非所宜惟閣下諒察

定興忠烈王集

檄

張輔

檄諭安南

是時新城侯爲大將故檄文歸之

安南密邇中國自我太祖高皇帝肇膺天命統

一寰區其王陳日燿率先歸順錫爵頒恩傳序承宗

多歷年所賊人黎季犛父子爲其臣輔擅政專權久

懷覬覦竟行弑奪季犛易姓名爲胡一元子黎蒼爲

胡奩謬托姻親益彰威福手弑其主戕及合家肆逞

兇暴虐于一國草木禽獸不得其寧天地鬼神之所

共怒皇上卽位之初隆懷遠之德黎賊父子遣使

入朝、挾姦請命、稱陳氏宗族已絕、已爲其甥暫權國
事、朝廷惟務推誠、未嘗詐逆、而前安南王之孫爲所
迫逐、逃入老撾、轉詣京師、訴其罪惡、朝廷初未之信
後因安南使人識其非僞、悲喜慰勞、不忘故主、遂以
璽書告諭、且欲興師、黎賊父子、知國主之有後、慮
天兵之下誅、遣使陳詞、乞赦誣罔、請迎歸國、以君事
之、朝廷信而不疑、略其舊過、嘉與自新、悉從所請、遣
使者以兵五千、護送還國、而黎賊父子、包藏禍心、設
伏境上、遮拒天兵、阻遏天使、執殺前安南國王之孫

使臣以聞，皇上震怒，特命將兵八十萬，討除逆賊。

惟茲伐暴之師，必著聲惡之實，賊人黎季犛父子兩

弑前安南國王，以據其國，罪一也。賊殺陳氏子孫宗

族殆盡，罪二也。不奉朝廷正朔，僭改國名大虞，妄稱

國號

尊號，紀元元聖，罪三也。視國人如仇讐，濫刑峻法，暴

殺無辜，重斂煩徵，剝削不已，使民手足無措，窮餓罔

依，或死填溝壑，或生逃他境，罪四也。世本姓黎，背其

祖宗，擅自改易，罪五也。憑陳氏之親，妄稱暫權國事，

以上罔朝廷，罪六也。聞國王有孫在京師，誑詞陳請

皇明經世編

姚張二公集 檄諭卷四 九

平露堂

迎歸本國，以臣事之。及朝廷赦其前過，俯從所請，而益肆邪謀，遮拒天兵，阻遏天使，罪七也。其安南國王之孫始被迫逐，萬死一生。皇上仁聖，矜憫存恤，資給護送，俾還本土。黎賊父子，不思感悔，竟誘殺之，逆天滅理，罪八也。寧遠州世奉中國職貢，黎賊恃強奪其七寨，占管人民，殺虜男女，罪九也。又殺其上官刁吉罕之壻刁猛，慢虜其女囊，亦以爲驅使，強徵差發銀兩，驅役百端，罪十也。咸逼各處土官，趨走執役，發兵搜捕夷民，致一槩驚走，罪十一也。侵占思明府祿

州西平州永平寨之地、及朝廷遣使索取、巧詞支吾、所還舊地、十無二三、罪十二也、還地之後、又遣賊徒、據西平州、劫殺朝廷命官、復謀來寇廣西、罪十三也、占城國王占巴的賴新遭父喪、卽舉兵攻其舊州、格列等地、罪十四也、又攻占城板達郎白黑等四州、盡掠其人民孳畜、罪十五也、又加兵占城、取其象百餘隻、及占沙離牙等地、罪十六也、占城爲中國藩臣、旣受朝廷印章服物、黎賊乃自造鍍金銀印九章、冕服玉帶等物、以逼賜其王、罪十七也、責占城國王惟尊

中國不重安南，以此一年凡兩加兵，罪十八也。天使以占城使者同往本國，黎賊以兵劫之于尸毘奈港口，罪十九也。朝貢中國，不遣陪臣，乃取罪人假以官職，使之爲使，如此欺侮不敬，罪二十也。斯其大者，餘不悉言。惟黎賊父子不臣之罪，滔天罔旣，理不能容。其諸國人遭罹荼毒，積有歲年，深可憐憫。天兵之來，正爲弔爾民之困苦，復陳氏之宗祀，已嚴飭將士秋毫無犯，可皆安堵如故，勿妄驚疑。其脅從官吏，本出威逼，實非心從，可各安職役，皆不加罪。若曾同惡協

謀今能改心易慮，幡然效順，亦許自新。原任官職，亦仍其舊。其有各國之人，見在安南經商，或被拘留者，可悉赴軍門自陳，卽與護送還國。其有願留買賣者，聽若能爲一國之人造福，生擒黎賊父子，送至軍門者，重加爵賞。敢有昏迷不俊，助惡拒命，天戈一指，掃蕩無遺。待黎賊父子就擒之日，卽會集爾官員將吏國人耆老，選求陳氏子孫，復其王爵，雪幽寃于地下。解倒懸于國中，上以副皇上之心，下以慰爾民之望。

露布

進平南獻俘露布

平南露布

臣張輔上言、伏以天討有罪、聿與弔伐之師、武功告成、爰舉獻俘之禮、渠魁盡獲、海嶠肅清、蓋刻惡必鋤、其本根、而絕患寧存乎、胡孽安南逆賊黎季犛、更姓名胡一元、及子黎滄、更姓名胡奩者、僻居炎徼、負固海隅、豺狼之殘孽、蛇虺之遺毒、戕賊國主、潛移陳氏之宗祧、荼毒生民、數犯朝廷之邊境、攻圍詔使、侵暴隣邦、僭稱大虞、竊紀年號、酷刑威衆、人懷孛戮之

憂橫斂剝民家被拮尅之害啣寃動地無辜顛天

聖恩嘗許其自新狂豎怙終而不改擠遏天朝之

使賊殺故王之孫兇甚三苗舜法豈容於原宥罪浮

反側漢兵必事於剪除臣等恭奉制書捻率師旅鷹

鷂擊用四六體而行兵節度俱已蕪之評矣鵬鶚先雲氣而度斗南貔虎熊羆挾風威而踰嶺

表屢破重關之險飛渡長江遂拔多邦之城殲夷羣

醜乃乘破竹之勢分逐窟蒿之夷東都立平西都亟

下餘孽如蟻螳之聚迅掃於盤灘困牧皆交南地名賊黨猶燭火

之然撲滅於嚙江仙侶市廛安堵郡邑嚮風士民上

書陳其罪惡者動以千計土人效順願同追勦者何
啻萬人乃督舟師進逼膠水逐鯨鯢於海口困虎兕
於柙中暫爾偷生須臾延命因駐我師而設備欲致
彼賊以就誅狂悖猶欲鴟張醜類仍懷豕突傳報賊
眾引兵駕象以來侵憤激諸軍鳴劍抵掌而往捕臣
彬臣旭戒行既遠都督柳升驚報倏來賊復入於黃
江船悉來於閩海遣僞將朝射仁鑑等於今年三月
三十日犯鹹子關臣輔遂用弩弓躍馬督陳以麾兵
調驃騎將軍吳旺劉塔出遊擊將軍林帖木兒神機

將軍張勝丁能朱貴橫海將軍王玉都指揮黃義指
揮李敬等領精兵而直前急擊登岸之勁賊都督僉
事柳升黃中鷹揚將軍江浩徐泰都指揮徐正等率
舟師而力戰奮勦游水之逆徒殲其羣兇斃其首將
瀘水盡赤長江屍壅而血腥殺氣騰空終日雲昏而
霧慘臣晟率都指揮柳宗等領馬步官軍水陸夾攻
矢鏑雨注而莫之敢遏鏡砲雷鉤而所向無前大肆
剪屠餘燼潰散臣彬臣旭聞報繼至臣輔率驃騎將
軍朱榮等乘勢追襲由嚕江至於黃江賊首敗其徒

黨棄槩奔逃、獲海艦及其戰艦、直抵閩海、聞賊首等輕舟復竄海濱、遂洗滌脇從、綏懷降附、臣晟等率其都指揮俞讓等、亦由嚙江直至龍王海口、獲到戰守船隻、釋其拘繫人民、臣輔等以賊巢旣傾、兇徒盡散、遂振旅于膠水、復陳師于交州、誓殄賊以寧邊、常奮身而勵衆、議留臣旭、備禦黃江等處、臣輔、臣彬、領馬步官軍、倍道兼進、直窮海陬、追擒賊首、臣輔仍調柳升、橫海將軍魯隣等、并土人知府莫遠等、臣晟調指揮李節、并土人知府阮太等、各領戰艦、由水路窮追、

四月二十三日、師過清花府、磊江賊衆猶舉幕尾而致毒、欲逞螳臂以當輪、遂分調前隊官軍、勦殺戈船、邀擊而夾岸奔走、矛戟爭馳而望風披靡、殘夷敗衄、士氣倍增、二十九日、舟師至典史門、涇鵲淺、晴久水涸、賊衆捐舟而先遁、我軍進而莫前、俄然雲作、沛然雨下、水漲數尺、信川祇之效靈、船過千艘、豈人力之能致、不待渡河而冰合、奚勞拜井而泉流、有開必先、慶罪人之斯得、惟動丕應、仰 聖德之格天、師進演

州府茶龍縣探知首賊、逋于義安府深江、狐疑猶豫

方謀三窟以庇身雷勵風飛不可一日而縱賊臣輔
率都指揮陳懷巫凱等由土田縣舉厥江東臣彬率
都指揮俞讓盧旺俞其指揮王英等舉厥江西各從
陸路掩襲游蒐震悼焚舟欲竄于新平餘黨離披投
杖來降于海口臣輔復調黃中神機將軍程寬張勝
丁能驃騎將軍劉賽因不花游擊將軍朱廣王恕等
循海而追躬率大軍馳躡至日南州柳升等魯麟舟
師先於奇羅海口敗殺賊徒奪其戰舸五月十一日
其所領永定等衛軍士王柴胡等七人生擒賊首黎

軍士亦敘功以獲賊首也

季犛黃中所領指揮陳欽率交州右衛軍人李保等
十人於海口山中擒獲賊男黎澄十二日莫邃下頭
目武如卿等五人于益海畔高望山生擒賊首黎滄
及其男黎柄臣晟臣彬尋跡追襲亦至日南州據阮
太等報初十日于奇羅海口擒獲賊弟季貔并姪黎
源咎等其胡杜范六才阮彥光段擊等賊之爪距亦
既就擒陳日昭阮飛卿阮謹杜滿等賊之心膂悉皆
降附過師枕席之上簞食來迎救民水火之中室家
相慶寬宥迫脇招撫流離奉宣 恩命獲遂更生掃

皇明經世編

姚張二公集

卷之一

五

平露堂

魍魎於炎荒，息妖氛於瘴海。臣輔等稽諸載籍，安南本古交州，漢唐僅能羈縻。宋元猶被侵侮，僭竊跳梁。狃于故習，雖加兵而致討，終叛服而不常。矧茲逆於生靈，覆載不容，人神共憤。今父子兄弟，皆綁縛于轅門，宗族僞官，咸生擒於麾下。自謂蠻烟瘴雨之瘴，虞歷代兵威所不能加，孰知聖德神功之齊天，六合全封而莫敢敵，戡定之速，邁三年之克鬼方，俘獲而還。陋六月之伐獯猷，雪前代之遺恨，解邦民之倒懸。將士歡呼，知天心之助順，蠻夷舞作，信人道之惡盈。

是皆 聖畧淵深、明見萬里之外、 天威烜赫、坐收
三捷之功、數百種雕題、馘舌之民、咸躋壽域、幾千里
魚鹽繁衍之地、盡入輿圖、復隆古之封疆、布中華之
禮制、通前所平州府四十八處、縣一百八十六處、戶
三百一十二萬五千九百、所獲象一百一十二、馬四
百二十、牛三萬五千七百五十、船八千八百六十五
其所俘斬獲級軍資器仗、別奏條上、臣等今將生擒
到賊首偽大虞國上皇黎季犛等、獻俘 闕下、其餘
解送擒獲、并降附偽官、別具奏聞、臣等會無汗血之

勞獲伸敵愾之志，皆遵成算，得效微勤。平定南夷，克清大憝，獻俘而告。廟社仰荅，神靈盛醮，以賜繼夷，用昭天憲。聿新萬年之治化，永樂四海之清寧。無任歡呼欣忭之至。

皇明經世文編卷之十四

陳子龍臥子 徐孚遠開公
華亭 編輯

宋徵璧尚木 周立勳勒卣

陳玄燾鑑先叅閱

蹇忠定公疏

疏 蹇 義

銓官事宜疏 銓選

在京各衙門官原有定額近因事煩額外添設不無
冗員宜令各衙門依定額選留餘並送部別用在外

大小衙門官亦有多設宜令所隸上司嚴行考覈其
罷軟不勝及老疾貪墨者悉送赴部今年所取進士
諸司無缺銓注各王府教授伴讀多缺擬于第三甲
內選用仍令食進士八品之祿第二甲第三甲進士
擬量留七十員分隸諸司觀政遇缺取用餘悉遣歸
進學凡冠帶舉人亦令歸進學以待後科會試諸司
歷事監生例于三月後授官近因少缺有一年未授
者而內府辦事監生止是謄寫奏本查理文冊稽筭
數目別無政務比內官監奏准半歲授官而歷事監

此依記內官之故

生有政務者。授官及遲。今後宜令所司內府辦事。監生月日滿者。定例給賞。仍令回監進學。依次歷事出身。

上言十事疏

時政利弊

其一曰在外布政司按察司府州縣官。職在承流宣化。以撫字爲職。必須得人。然得入之道。在銓選精嚴。薦舉有法。宜令在內文職七品以上及近侍官。在外五品以上及縣正官。各舉所知。五品以下官及無過

此說宗舊法。今復奉行。

犯民人。賢能廉幹。堪任牧民。及居風憲者一人。吏部

考驗、如果賢能、量才擢用、其所保非才、或授職之後、
關葺貪污、舉主連坐。其二曰在外諸司官吏、卽今
雖有所轄上司、及巡按監察御史考察、然卒苟虛故
事而已、宜從吏部都察院申飭、務在考察嚴明、賢否
有別、若因循苟且、仍使不才者僥倖在職、所轄上司
以違制論。分巡按察司官及巡按御史各以失職論。
其所屬官員、在任應考、而夤緣推避、及所轄上司不
依期考察者、事發各坐以罪。其三曰在外軍民利
病未盡上達者、蓋由諸司官吏不恤下情、共爲蒙蔽、

宜選在京四品以上文職官，廉明謹厚者。分行天下。詢訪軍民利病，廉察官吏賢否，舉求遺逸，敦禮高年。存問孤窮，伸理寃滯。則下情庶可周知，官吏有所恐懼也。其四曰刑部都察院職典刑名，而大理寺尤專詳讞。居是職者，必得其人。其官屬宜從堂上正佐官精加考覈，庸劣不稱者黜之，貪婪苛刻者罪之。其有作奸犯科者，責令互相糾舉，不許故縱。違者一體論罪。其五曰舊制刑部都察院罪囚，皆送大理寺審錄無寃，然後發落。有異詞者，駁正之，所以法得其平。

罪得其當。今大理寺乃同原問官會審。設有冤抑。因何敢辯。宜令如舊制。敢再紊成法者罪之。其六曰。在京各衛成造海船等件。所有物料。雖是官給。然有匠作原計數少。或該科放支斤兩不足。率令軍民賠補。頭會箕歛。侵損非細。宜令工部委官與管工官從實覆計。不足之數。官爲補支。不得科擾軍民。該庫關領之際。必依足數放支。巡視御史等官。就于庫外覆較明白。封記放出。若官吏減損其數。而御史等官不行執法。從公較驗。一體罪之。其七日。工部買辦諸

色物料中間或京庫見有或非急用之物一槩派下。

今珠色物料派州縣首每供官吏之除扣及奸商

有司得以科擾作弊宜令工部查非急用之物卽皆

之侵領而已

停止若京庫見有則就閔支免致科派民受其害。

其八曰各處人民賠納官物多有貧難賠償不得而

以其情告官官不爲理更加督促計窮勢迫願投克

軍原其本情豈所得已今後若有此等合准所告其

賠納官物免追其九曰各處逃軍逃囚多有藏匿

山林畏罪不出因而糾衆爲非宜令兵部榜諭許以

自新就于所在官司首告與免本罪軍還原伍囚送

所司發落。其十日各處犯罪問發北京為民及充軍種田者或有逃逸例皆全家起發若有原籍丁多糧重應當別差及充軍等項全家起發似亦未宜今後如有此等止取一丁連家小先發赴屯如得原逃正身依律斷遣免其全家起發

夏忠靖公集

頌

夏原吉

河清頌 并序 河清

永樂二年冬十二月十七日至永樂三年春正月十

八日黃河水清，凡數百里。於是秦王及高平王相繼奉表稱賀。上謙讓弗居，群臣固請，咸謂不可不承天心，以虛靈貺。遂俯狗輿情，受賀于奉天殿，慶協神人，歡騰朝野，猗歟盛哉！誠亘古以來非常之奇遇也。臣伏念自古王者政平，地出醴泉，聖人在位，海不揚波，禎祥所見，必有非偶然者。矧今皇上以天縱聖神，削平內難，簡賢命良，省刑薄賦，恩覃乎遠，邇德被乎垂魚，至和氤氳，充滿無間，由是嘉禾生，仁獸至，野蟹成，神龜出，然猶未足以擅厥美，迺致黃河水清，綿

皇明經世編

卷之一

河清

五

平露堂

亘數百里。豈非天意。欲以彰 皇上之潔白一心。澄
清九有。內體乾德。外著陽剛。故特以此而爲休徵之
應哉。是蓋不獨爲 皇上一身之慶。而且爲華夏億
兆民之慶。不獨爲 朝廷今日之祥。而且爲宗社千
萬世之祥矣。臣原吉忝綴六卿。獲瞻盛事。雖匪才淺
學。莫克稱揚。然忻忭之餘。不容自默。謹拜手稽首。而
獻頌曰。於皇 太祖。孔神孔武。受命自天。奄有下土。
網陳紀立。禮備樂明。熙熙皞皞。民樂太平。龍馭上征。
作賓于帝。群姦肆欺。構難生厲。穆穆我 皇。應天順

人嗣承寶曆。大命維新。迺揚聖謨。迺開舊制。億兆歸
心。蠻夷奉贄。餘稜屏息。至和誕敷。天錫靈貺。用作真
符。既有嘉禾。復有仁獸。野蠶神龜。迭見先後。所發未
艾。黃河載清。亘數百里。湛徹虛明。華彩畢呈。光輝交
煥。澡沔日星。涵濡雲漢。無污不滌。無垢不消。無微不
鑑。無蘊不昭。造化周旋。孰爲臻此。垂象從類。以彰厥
美。繫皇秉心。淵淨潔澄。日新又新。聖德孔宏。爰
熙庶務。昭融洞徹。光臨下土。如彼日月。體信達順。上
格于天。天道不違。因河以宣。彼河斯清。匪水所發。維

皇治功。維皇心法。治功心法。曷徵于河源深流長
遺祉之多。聖子神孫。繩繩繼繼。於千萬年。永配天
地。

平安南頌 并序 平安南

聖天子以皇天眷顧之隆。太祖高皇帝付託之
重。乃御大歷服。典司神人。綱舉目張。禮明樂備。品
物咸遂。福祥並臻。五年于茲矣。而安南賊臣黎季犛
戕暴其君。魚肉其民。侵逼鄰邦。侮辱朝使。皇上以
戎狄蠻貊。不可律以中國憲度。迨誅曠罰久矣。季犛

不知悔禍，益肆姦狂。於是內而百官，外而占城，合辭請討。皇上乃徇輿情，命大將帥師征之。中軍擣其中，左軍折其翼，右軍倚其角，而占城舟師復扼其奔逸之路。季聲自知罪在不赦，冒歿力抗。然而上下解體，兵敗身縛。其脅從將領，邈遠部落，悉皆蒲伏乞哀。受命于吏，請比內郡。乃立都指揮布政按察諸司，選用守令，以撫安其衆。累世逋寇，一朝剪除。報至闕庭，中外稱慶。臣按周宣王平淮夷，唐太宗擒頡利，當時文人咸形諸賦詠，以紀宏休。臣職備民曹，敢不採摭。

皇明經世編

寒夏二公集

平安南

卷之一
七、 平露堂

事實揄揚帝載。發爲歌頌。以顯示無極。頌曰於昭上帝。眷命我皇。上承大統。下撫萬方。孰危未寧。孰昧未明。敷我彝典。俾各遂成。旰食宵衣。不自滿假。方吐圓臚。咸藉陶冶。萬山宗泰。衆星拱北。駢首弭志。無思不服。相彼安南。稊米黑子。敢爾跳梁。干我天紀。命將往問。出車彭彭。彼頌率醒。奮臂以亢。乃哀其徒。鷄翎是扼。金鼓一鳴。倒戈以北。湯湯富良。彼恃天塹。我師飛越。胆寒心顛。土崩瓦解。逃生無門。艸薶禽獮。噍類罔存。爰立司牧。樹守設宰。平問無辜。恤其飢餒。乃旬

乃宜于仁于禮，簞食壺漿，我皇久徯，稽顙致詞，始
迷不知，詎意今朝，重覩漢儀，婦語耄倪，服我疆畝，我
怙我恃，父母不遠，仰祝聖主，億載萬年，聖子神
孫，寶祚綿繇，周伐淮夷，江漢歌雅，宋擒劉鋹，凱歌獻
社，斯皆內地，奚足揄揚，矧茲駿功，可無頌章，爰據事
實，載陳盛美，勸忠聖頑，垂示無已。

瑞應騶虞頌 并序 騶虞

洪惟皇帝陛下，纘承大統，克勤庶政，聲教誕敷，仁
恩旁洽，天地既位，萬物自育，而瑞應駢臻，不可殫記。

乃宣德四年春，滁之來安，有騶虞二，見于石固山，南京守臣襄城伯臣李隆以之獻于闕下，詔賜群臣觀之。蓋猊首虎軀，白質黑章，修尾隅目，而其性甚馴，真盛世之瑞物也。臣原吉退而稽諸載籍，曰：騶虞，仁獸也。天下太平，人君有至信之德，則應。竊嘗考之，往古惟兄詠于周之詩人，自時厥後，千數百年之間，曠焉莫之觀。我朝自太祖高皇帝肇興鴻業，至于太宗文皇帝紹承厥緒，積德累仁，至深至厚，海內康寧，四方無警，然後騶虞迭出，臣獲見焉。及我皇上踐

祚以來、禮樂刑政、號令法度之施、一遵祖宗之舊、與民爲信、無所更革、故和氣充周、而茲仁獸復見于滌、滌固畿內之地、且又兩端並出、匹休麗美、何其盛哉、聖德之所感孚、皇天之所眷佑、于此端可見矣、昔者白雉獻于越裳、天馬來自西域、猶且紀諸策書、見于歌詠、傳誦至今、矧茲嘉瑞、出于中國畿內之近者乎、是宜被之聲詩、以昭聖德、垂示無窮、臣雖拙于文辭、然躬覩盛美、不敢以默、謹拜手稽首而獻頌曰、惟我聖皇、總統萬方、禮樂明備、治具畢張、民

安其所。物無疵癘。和氣氤氳。鍾爲嘉瑞。惟茲嘉瑞。匪
熊匪貔。匪角匪鬣。曰惟騶虞。玄靈之文。玉雪之質。修
尾回風。雙瞳炯日。飢不暴物。行避生芻。由心之仁。匪
人之驅。神行電邁。千里一息。其性則然。不以其力。侶
遊儷美。同出一時。不產他邦。乃在郊畿。守臣致之。獻
于丹闕。自然馴伏。聖情欣悅。百辟環覩。歡動明廷。
曰惟茲獸。瑞世之徵。惟瑞之徵。惟天子聖。聖德格
天。受天之慶。惟慶之錫。惟天子明。聖壽齊天。億千

萬齡。

瑞應白鳥頌 并序 白鳥

景陵全盛之朝，二值好文之主，當時待從多先朝

皇帝臨御之五年，實為宣德之四年，廣東海陽民以

舊德典頌之文未稱盛美可嘆也

二白鳥來獻，進覽之次，賜羣臣觀于廷，雪質瓊姿，玄

眸玉喙，怡然馴淑之態，克然慈孝之心，誠盛代之嘉

禎，太平之上瑞，其出也，豈偶然哉，謹按瑞應圖曰：帝

王禮敬宗廟，備于孝慈，則白鳥見，又曰：帝王肅敬宗

廟，仁孝篤至，則白鳥見，欽惟我 皇上稟聰明睿智

之資，備文武聖神之德，自纂承丕緒以來，夙夜孜孜

勵精圖治，簡任賢俊，而興修禮樂，旌別淑慝，以振立

紀綱明罰慎刑，期民無愁嘆之聲，薄賦輕徭，與野有
謳歌之樂，至于承事宗廟，則尤嚴禮敬，奉養 聖母，
則篤盡孝誠，無一事而不適中，無一物之不得所，是
以穹祗昭格，海宇清寧，和氣充溢乎兩間，皇風彌布
乎六合，凡諸福之祥，諸物之瑞，莫不駢臻疊至，以應
昌期，然不能一二足也，故此白鳥雙見于海隅，而其
民之愛戴乎上者，不遠萬里，貢于闕廷，以兆我國家
萬萬年太平悠久之徵，以昭我 皇上萬萬年仁孝
廣大之德，猗歟盛哉，臣叨列清班，獲瞻奇瑞，雖才識

疎陋不足以稱揚盛美，然欣忭之餘，不能自默，謹拜
手稽首，而獻頌曰：於昭我皇，聖神文武，纂承丕圖，
撫有九土，九土奕奕，兆姓蚩蚩，匪弘治化，曷臻雍熙，
乃殫聖衷，乃勤聖質，宵分而衣，日晏而食，旌別
淑慝，登崇俊良，制禮作樂，振紀立綱，禮樂昭宣，紀綱
明肅，惟賦惟刑，是輕是恤，百度旣俟，庶績咸熙，仰惟
宗廟，敢忘孝思，孝思維何，奉先追遠，禴祠烝嘗，一嚴
禮典，載惟聖母，壽慶天齊，致孝致養，前聖曷希，於
周有昌，於虞有舜，皇心之同，篤盡敬順，敬順旣篤，

聖德益隆，穹祗昭格，神明感通，克克兩間，和氣勃鬱，
靈貺薦臻，嘉祥疊出，乃歲己酉，七月仲秋，爰有雙鳥，
見于海甌，雪質鮮明，霜姿瑩潔，修喙若瓊，玄眸點墨，
不驚而擾，不暴而侵，馴淑之態，孝慈之心，貯以雕籠，
藉以文帛，遠駕星輶，入貢天闕，龍顏悅視，臣鄰聚觀，
懽騰丹陛，喜溢金鑾，惟此雙鳥，實國之瑞，聖壽以
彰，聖心以慰，嗟嗟小兆，叨際清時，觀此嘉瑞，贊詠
敢積，惟皇聖明，道超三五，安輯羣黎，繩其祖武，惟
皇聖明，壽齊天地，萬億子孫，傳承無替。

疏

一蘇松水利疏

開濬三江

忠靖公治水我吳厥功甚偉考其文集及承樂實

上以蘇松水患為憂命臣特往疏治八月遣都御史

銖經畫漕沒殊為可恨

俞吉齋水利集以賜臣原吉使講究拯治之法是原

吉上奏但臣奉職不稱重貽宵旰之憂夙夜驚惕惟

勤咨訪欽承 聖諭愧感交集臣與同事官屬及諸

曉水利者叅攷輿論頗得梗槩蓋浙西諸郡蘇松最

居下流嘉湖常三郡土田下者少高者多環以太湖

綿亘數百里受納杭湖宣歙諸州溪澗之水散注澱

山等湖以入三泖。頃爲浦港湮塞。滙流漲溢。傷害苗稼。拯治之法。要在浚滌。吳淞江諸浦。導其壅塞。以入于海。但吳淞江延袤二百五十餘里。廣一百五十餘丈。西接太湖。東通大海。前代屢疏導之。然嘗潮汐之衝。沙泥淤積。屢浚屢塞。不能經久。自吳江之長橋至夏駕浦。約一百二十餘里。雖云通流。多有淺狹之處。自夏駕浦抵上海縣南踰浦口一百三十餘里。湖沙漸漲。潮汐沙壅。障菱蘆。蕪生。已成平陸。欲卽開浚。工費浩大。且濫沙游泥。浮泛動盪。難以施工。臣等相視

得嘉定之劉家港，卽古婁江。徑通大海。常熟之白茅港，徑入大江。皆係大川。水流迅急，宜浚吳淞江南北兩岸安亭等浦港，以引太湖諸水入劉家白茅二港。使直注江海。又松江大黃浦，乃通吳淞江要道。今下流壅遏難流，倘有范家洪至南贍浦口，可徑達海。宜浚令深濶，上接大黃浦，以達泖湖之水。此卽禹貢三江入海之迹。俟旣開通，相度地勢，各置石閘，以時啓閉。每時水涸之時，修築扞岸，以禦暴流。如此則事功可成，於民爲便也。

皇明經世文編卷之終